

ե մի փոքր յեկեղեցի Պողոս—Պետրոս անունով. յերկու առաքյալների բարձրաքանդակները զարդարում են դրան աջ և ձախ կողմերը և համեմատաբար մի այնպիսի գեղեցկութամբ, վոր քիչ և պատահում հայ պատկերաքանդակների մեջ (պատկ. 25). հավանորեն այդ քանդակներով ել վորոշված ե յեկեղեցու անունը: Իրան կամարակալ քարի վերա դեղագրով դրոշմված ե յեղեկ Վասակի արձանագրությունը. հետոյ միայն մի մասը փորագրված ե, մնացածն այդ պատճառով ել յեղծված և միայն հատ հատ տառեր նշմարելի. կարդացվում ե այսչափ.

Թվ. Հ. ՉԺԹ: առաջնոր  
դութի (s!) Երեմիայի ես Վասակ թոռն  
Ղաղբակայ որդի Գրգրոյ ի նեղ ...  
ժամանակ ...\*

Հավանական ե, վոր շինության արձանագրությունն ե այս. շինողն ել Գրիգորի վորդի Վասակն ե,

բայց պնդել կարող չենք. ուրիշ վոր և ե արձանագրության հետք այս յեկեղեցու վրա նկատելի չե: Յերեմիայի առաջնորդության մասին հիշատակությունն ունինք և ուրիշ աղբյուրից. Վարդան վաղապետ յուր Դանիելի մեկնության հիշատակարանի մեջ գրում ե հետևյալը. «Եւ սկսաք ի ՉԺԳ թու. ի սբ Վիրապին. և կատարեցաւ ի ՉԺԷ. առաջի սբ և փառաւոր նահատակիս սբ Ստեփանոսիս ի սբ ուխտս Աղչոց վանիցս, յառաջնորդութեն Երեմիայ (s!) գովելի ասպնջականի և զոհանալի եղբարց»\*:

Յեկեղեցու արևելյան կողմը 1287 թ. կանգնած մի խաչարձանի պատվանդանի արձանագրությունն թվագրված ե ի միջի այլոց «եւ ի տէրութե տեղոյս պարոն Աշոտոյ». թեև ուրիշ ցուցում չունինք, բայց անհավանական չե, վոր «պարոն Աշոտը» Գրիգոր Խաղբակյանի թոռը կամ Վասակ Բ-ի վորդին լինի (Հավել. Ա. 12)\*\*:

Սորանով վերջանում ե մեր ծանոթությունը Գրիգոր Խաղբակյանի և նորա սերնդի մասին:

Ե

ՊՌՈՇ ՄԵԾ ԻՇԽԱՆԸ (1223—1284).

Խաղբակյան տոհմի կողմնապետական իշխանության ամենափառավոր շրջանը Վասակի վորդի Պոռշի ժամանակն ե. յէրբ մեռավ Վասակ և յէրբ անցավ նորա տեղը Պոռշ, կարող ենք միայն մոտավոր ճշդությամբ վորոշել: Գանձակի պատերազմի ժամանակ 1222 թվին՝ կենդանի եր դեռ ևս Վասակ, թեև նորա անունը հիշատակված չե մասնակցողների մեջ, և հավանորեն բացակա յեր ծերության պատճառով. Այրիվանեցին նորա մահը նշանակում ե Գանձակի պատերազմից անմիջապես հետո. «փոխեցաւ ի Քրիստոս Վասակ իշխանաց իշխանն և էառ զգրոշայն որդի նորա քաջն Պոռշ»\*\*.

Գանձակի պատերազմի համար նշանակելով 1221 թիվը, Վասակի մահվան հաջորդող դեպքը Այրիվանեցու մեջ Ջալալդղիների արշավանքն ե, վոր Ատրպատականի սահմաններում հանդես յեկավ 1222 թվին<sup>1</sup>, իսկ Հայաստան արշավեց ըստ Գանձակեցու, Վարդանի և Որբելյանի 1225 թվին<sup>2</sup>. ուրեմն 1223/4 թ. պետք ե պա-

տահած լինի Վասակի մահը: Հորից քիչ առաջ վախճանված եր և յերկրորդ վորդին Մկղեմը. ապա թե վոչ նա ժառանգ կհանդիսանար ԺԳ դարում ընդհանրացած իրավունքի համեմատ և վոչ կրտսեր Պոռշը<sup>1</sup>: Այրիվանեցու հակիրճ տեղեկությունը դրոշակն առնելու մասին մեզ համար շատ թանգագին ե. կողմնապետության կամ սպարապետության նշանն եր այդ խաղաղության և պատերազմի ժամանակ: Այդպիսի մի յերկրորդ տեղեկություն տեսանք և Մահկանաբերդի իշխանների մասին, վոր մի և նույն ժամանակ Տփլիսի քաղաքապետներն եյին, ամիրաները կամ շահապները<sup>2</sup>: Ի՞նչ եր Պոռշյանների զինանշանը. բոլորովին հաստատ հիշատակությունն չունինք այդ մասին, բայց անհավանական չե, վոր իրար դեմ կանգնած և շղթայված զույգ առյուծներ լինեյին. գուցե և շղթայված առյուծ և յիվ

\* Յերկրորդ տողի «թոռն» բառի Գ-ի գլուխը կոտրած. յերրորդ տողի «ղաղբակայ» դեղագրով և միացած ընդգծվածը: Բազմակետով նշանակված մասը կարմիր դեղագրով ե և յեղծված:

\*\* Այրիվանեցի յեր. 65:  
1 Стэнли Лэн—Пуль, Мусульманския Династии. перев. В. Бартольд. СП. 1899. стр. 150. - А. Мюллер (Ист. Ислама. III. 241) Ատրպատականի տիրապետությունը նշանակում ե հիջրայի 625 թ., իսկ Վրացիների (և Հայոց) հետ ընդհարումը 626 թ.:  
2 Գանձակեցի 211. Վարդան 187. Օրբ. 399:

\* Ձեռ. Էջմ. № 2049, 359բ. համ. Շողակաթ. յեր. 33: Նույն հիշատակարանն ունինք և Վարագից պատերազմի ընթացքում բերված և այժմ № 242 Ձ-ում. բայց սկսման թվականն այստեղ տարբեր ե, կարծում ենք գրչի սխալ. «Եւ սկսաք ի ՉԺԳ (թե Գ) թուլիս հայոց ի սբ վիրապիս ...»:

\*\* Տես մեր հոդվածը «Շողակաթ», Ձագավանից ժողովը. յեր. 26:  
1 Գոշ Մխիթար. Դատաստանագիրք Հայոց. հրատ. Բաստամեանի. Վաղարշապ. 1880. 300. Համ. մեր հոդվածը Христ. Восток Т. II. вып II. Потомство Тарсаича Орбеляна и Минахатуны. 1913. 225.  
2 Ալիշ. Հայապատում. 390: